

## Suão Sesus tuktsa bo ziwatahaka

Tubabatu kytsa watahaha — Suão ziwatahaka — mynakaranaha. Suão Sesus tuk zinymyrykyta. — Tynaharape pokzitsikinaha — ana hi ziwatahaka. Aba katsa kino niwatihi tanymyryky.

### *Sesus Kiristu Deus harere baba.*

<sup>1</sup> Abaka katsaktsa ikiahatsa bo tahawatahakanaha. Sesus Kiristu ahabo tawatawy tsihikik iwatsahi tawatahaka. Deus isuknihi byituze Sesus Kiristu koikny baktatu my. Atakta Deus harere babata tu hÿ. Iharere humo tsikspirikpokonaha zeka meky watu tsimoziknaha. Tsimyhyrikosokdanahaze ituk mywahi tsimynapykyryknaha Sesus Kiristu inasikze iharere tsiwabynaha hÿ. Tsinynaha. Ituk zikzurukunaha. Abaka ibo mytsatyziu tsimykaranaha.

<sup>2</sup> Atakta mybarawy bo inasikze mywata niyzik. Iwatsahi katsaktsa tsinynaha. Ata soho hi tsimytsasokonaha. Asahi ihumo mospirikponahaze meky watu moziknaha. Tsimyhyrikosokdanahaze Deus tuk mywahi tsimynapykyryknaha. Atakta Deus tuk tawahi mynapykyryk. Tubabatu Deus tuk koikny baktatu mybo tawatawy.

<sup>3</sup> Nawa ha ty botu tsinynaha ahabo tsimyt-sasokonaha. Botu tsiwabynaha hi ahabo tsimyt-sasokonaha. Tsimytsasokonahaze isoho humo ahahyrinymyrÿtsa. Ikiahatsa mywatsa Deus myzo

hyrytsa tsimoziknaha. Katsaktsa Sesus Kiristu tukytsa tsimaha ikiahatsa kino niwatihi mytuk itukytsa tsimoziknaha. Iwatsahi ahabo tsimyt-sasokonaha ikiahatsa kino niwatihi mytukytsa tsimoziknaha. Katsaktsa myzubarẽtsa astsatu tsimoziknaha hỹ.

<sup>4</sup> Anahi tawatahaka iwatsahi ahakurẽtsa tsimoziknaha. Ikiahatsa Sesus humo ahaspirikporẽtsa. Katsaktsa mykurẽtsa tsimykaranaha

*Deus haramwe eksok hyrity wa.*

<sup>5</sup> Wabyziutaha! Deus wasania ty ahabo tsimyt-sasokonaha. Deus haramwe eksok hyrity wa. Atazuba imysapyrẽnikita. Ihumo mypubara zuba. Katsa mysopyksapybyitsa tu tsimykaranaha zeka batu ituk zikapykyknaha. Amy ty batu mysapykytsa papatu tsimykaranahaze mysikpybyrẽtsa tsimoziknaha. Katsa wasani tsimaha zeka haramwe eksok hyrity wa iwaze Deus tuk tsimypykyryknaha. Anahi Sesus mybo nitsaso katsa iharere tsiwabynaha. <sup>6</sup> Katsaktsa:

— O Deus atukytsa tsimaha — mytsaty ahabyitsa tsimykaranaha. Hawaha tsimyt-sasokonaha zeka mysapybyitsa tu tsimykaranaha mybarapetu tsimykaranaha. Katsa wasanibara ty tsimyzurukunaha. Iwaze batu Deus tuktsa tsimoziknaha. <sup>7</sup> Deus ta batu zimyi batu ziky. Atazuba haramwe eksok hyrity wa. Wasanikita. Katsa iwata tsimyzurukunaha zeka tyharape hapokzitsikinaha, Deus mysopyksapybyitsa tu tsikykaranaha mymyokzohik. Sesus Deus tse iharapatawyhyta humo taspu ziwebaik nihyrikosokda ana humo hi mysapybyitsa tsikykaranaze Deus mymyokzohik. Abaka

Sesus humo meky watu tsimoziknaha. Ihumo mysapyrẽtsa tsimoziknaha hỹ.

<sup>8</sup> Katsa tihi zeka:

— Katsaktsa isapyrẽnikia ty zuba tsimykaranaha zeka. Deus harere bo zuba hyỹ tsimynakaranaha — mybarapetu tsimykaranaha. Batu ma zikaha. Iwa tsimykaranaha zeka mybarapetu tsimykaranaha. Anaharere humo hi baija tsimykaranaha. <sup>9</sup> Mysopyksapybyitsa tsimykaranaha zeka Deus bo tytsasonaha. Iwa mysapybyitsa ty ibo tsimytsasokonaha zeka iwahatu mymyokzohik. Iwa botu nitsaso iwatahi mysapybyitsa tsimykaranaha iharere humo mymyokzohik. Iharere wasani my. Ihumo meky watu tsimoziknaha. Ihumo mysapyrẽtsa tsimoziknaha hỹ. <sup>10</sup> Deus hi:

— Mybarawy ezektsa simysapybyitsa mykaranaha — niy. Tsimytsasokonaha zeka:

— O katsaktsa batu. Wasani tsimaha — mybarapetu tsimykaranaha. Iwa mybarapetu tsimykaranaha zeka Deus harere humo batu ahahyrinymyry tsipiwatawykynaha. Deus botu nitsaso mybarawy ezektsa sisapybyitsa mykaranaha, katsaktsa ipe tsimaha zeka:

— O batu wasani tsimỹ — iwatahi Deus mospihikbatakata wata mybarapetu tsimykaranaha.

## 2

*Kiristu mymytsumuẽhẽkik.*

<sup>1</sup> O myzubaha kahyrytsa watsa ikiahatsa bo piwatahaka iwahatu hawa batu sapybara humo ka batu ahakparawy. Iwaze imysapybara ty ka moewyhiktaha. Ikiahatsa ahamysapybara ty

tsimaha zeka Sesus Kiristu ahatsyhyryze Deus bo mopamykyso. Atahi pahabetesaka Deus myzo babata bo mopamykysoko. Sesus imysapyrënikita my. <sup>2</sup> Ata kino mysapyzekenihyrikosokda. Nihyrikosokdaze mysapyzekeniyzik. Iwatahi Deus mymyokzohik. Mybarawy ezeektsa sizubarëtsa imysapybara ty nikaranaha mysiokzo tsihikik hÿ.

<sup>3</sup> Deus harere bo hyÿ tsimykarannahaze itukytsa tsimoziknaha. Iharere bo hyÿ tsimykarannaha ana humo hi itukytsa tsimoziknaha. Anahi tsinymyrykynaha. <sup>4</sup> Aty iharere bo hyÿ byizeka katsa mype:

— Utakta Deus humo kahyrinymyrëta — mybarapetu nikara. Deus harere wasape nikara iharere wasani zuba ana humo kino batu ma ziky.

<sup>5</sup> Kytsa Deus harere bo hyÿ maha zeka Sesus humo sispirikporëtsa moziknaha. Asa kino Deus humo simypokzitsiukrëtsa anatyhi kytsa bo piwatawynaha. Deus harere bo hyÿ mykarannaha zeka hawa haty Deus mozihihikik yhÿ mykarannaha iwa Deus sopyk tanymyry. <sup>6</sup> Katsakta Deus pe tsimaha:

— O Deus hawa tsimyzihikik ana bo hyÿ — tsimaha. Iwaze hawa Sesus zikzuruku katsa kino niwatihi isopyk watu tsimykarannaha. Sesus watsa tsimyzurukunaha zeka iwaze hawa Deus mozihihikik yhÿ tsimykarannaha. Hawa mozihihikik ana humo hi myhyrinymyrëtsa hÿ.

### *Abaky mypehawy.*

<sup>7</sup> Kaharereziuwyttsa botu ahabo iktsasoko at-satu ahabo piwatahaka, kaharere ezytyk. Tubabatu myzotsa niakbakanahatsa botu nitsasonaha

hawa ahasopyk. Aba kino atsatu piwatahaka, kaharere ezytyk waha my.

<sup>8</sup> Ana soho hi ahabo piwatahaka. Hawa Sesus zikzuruku ikiahatsa kino niwatihi kytsa sopyk anahi tsinynahaze ana kino ezytyk waha my. Hawa Kiristu zikzuruku naha bo mytsaty tsimykarannahaze ana humo kino myhyrinymyrẽtsa. Sesus anaharere bo yhỹ ziknakara, iwatahi myzubaha bo nasisapywyky. Katsa kino niwathiktsa! Sesus haramwe eksok wa. Aty iharere bo hỹ mykaraze maku iwororo waha eze pitabaka tawata Sesus tuk kytsa mysipokzitsiki.

<sup>9</sup> Atahi:

— O uta Deus harere bo hỹ mykara. Katsy batu kakparawy ihumo kakyrirẽta — iwa mybarapetu mykara. Ata kino tatsy humo takyrikize zimyikik iwatahi Deus harere bo batu ma ziky. Maku miwa ha buruk pitabakaze tawata, tatsy tsiakyriurẽta humo. <sup>10</sup> Aty tatsy humo imypokzitsiki Deus harere bo hỹ mykara. Batu zimyi. Ata kino maku iwororo waha eze pitabaka tawata, tatsy pipokzitsiki humo.

<sup>11</sup> Atahi tatsy humo takyriki iwaze Deus harere bo batu h̃y ziky. Zimyiki. Ata kino maku wata miwa ha buruk pitabaka. Iktsabyitatu miwa humo izarata tawata. Atakta tatsy humo takyriki miwa ha buruk ta wata. Tsiakyriurẽta tuze Deus harere bo batu h̃y ziky izarata wata paikpa nikara.

<sup>12</sup> O katukytsa Sesus humo ahaspirikporẽtsa iwatsahi botu ahamysopyksapybyri ty tsikykarannaha zahaokzohik.

Sesus Kiristu myzahapokzitsiki mysapyzekenihyrikosokda iwatahi Deus ahamysopysapybyri ty tsikykaranaha zahaokzohik.

Ana hi ahabo piwatahaka.

<sup>13</sup> O sizotsa ahabo piwatahaka.

Abaka atahi Deus nanabyitaba suknihibyize koikny baktatu ata humo hi tsinynaha,

Sesus Kiristu kino niwatihi tsinynaha.

O siypykyhydytyktsa ahabo kino niwatihi piwatahaka.

Hyrikoso sapybara pehatsa harere bo batu hỹ tsimaha.

Abaka ikiahatsa Deus tuktsa tsimoziknaha. Kahyrytsa watsa ahabo piwatahaka,

Deus myzo humo botu ahahyrinymyrẽtsa.

<sup>14</sup> Sizotsa ahabo piwatahaka atahi Deus nanabyitaba suknihibyize koikny baktatu ata humo kino ahahyrinymyrẽtsa.

Atakta Sesus Kiristu ata kino niwatihi tsahahyrinymyrẽtsa.

Siypykyhydytyktsa ahabo piwatahaka ahapunihikrẽtsa humo.

Deus harere ahatuk, iharere bo zuba mytsaty tsimykaranaha.

Hyrikoso sapybara pehakatsa harere bo batu hỹ tsimaha.

<sup>15</sup> Ikiahatsa Deus sukyrytsitsa batu ahakparawy! Kytsa asahi Deus humo batu siakparawy tsizubarẽna mozihikiknaha. Ikiahatsa ja! Ikiahatsa siwatsa tsizubarẽna tsimyzihihikiknaha zeka Deus myzo batu ahatuk ziknapykyryk. <sup>16</sup> Kytsa asahi Deus harere bo batu hỹ mykaranaha tsizubarẽna mozihikiknaha.

Tahanamy bo zuba mytsaty mykaranaha. Amy bo iktsa maha zeka ana kino mozihikiknaha. Asa hi:

— O katsa zuba mynamy tsizubarëna. Iwatsahi myhyrizikwanitsa tsimoziknaha — mykaranaha. Kytsa sibo iktsa maha mozihikiknaha. Ikiyahatsa siwatsa ahasopyk zeka Deus humo batu ahaspirikpo.

<sup>17</sup> Aibani sinamy mohokdaba. Kytsa sinamy zuba mozihikiknaha bykyze sinamybyitsa moziknaha. Deus harere bo hyÿ tynakaranahaktsa iwaze Deus tuk tahawahi mynapykyryknaha hÿ.

### *Sesus Kiristu sukyrytsitsa.*

<sup>18</sup> O katukytsa tsizubarëna mopykbaze Satanas mozumu. Atakta Sesus batu iakparawy, isoho botu tsiwabynaha. Atahi sisukyrytsa. Sizubarëtsa Sesus Kiristu sukyrytsitsa botu zumunaha, iwatsahi nanabyitaba mopykbaze ana humo hi myhyrinymyrëtsa. <sup>19</sup> Asahi Kiristu humo batu siakparawy mysapy ekze zipokonaha. Sesus tuktsa iwatsahi mytukytsa watsa nikaranaha. Nitsasonahaze:

— Katsaktsa ahaututsa pauktsitsa tsimykaranaha — mybarapetu nikaranaha. Mytutsa pauktsitsa babatsa zeka ba zikponaha. Ziponahaze myututsa pauktsitsa byitsa tu iwa ziwatawnaha.

<sup>20</sup> Ikiyahatsa hi nawa ha ty wasani ahahyrinymyrëtsa. Deus hyrikoso ahatur mynapykyryk iwatsahi nawa ha ty wasani ahahumo tsahahyrinymyrëtsa. <sup>21</sup> Iwatahi aha bo piwatahaka. Asahi sispihikbatakatsitsa batu wasape zikaha, sihyrinymyrybyitsa bo batu

tywataha. Ikiyahatsa hi ahahyrinymyrëtsa iwatahi ahabo piwatahaka.

<sup>22</sup> Kytsa simyspihikbatanikitsitsa tihi:

— O Deus Sesus ty batu typeha. Sesus Deus tse byitatu. Deus Sesus zo byitatu — mykaranaha. Iwaze nitsasokonaha asahi Sesus Kiristu humo batu siakparawy. <sup>23</sup> Aty:

— O Sesus Deus tse ana humo hi batu spirikpo mykara — iwa my zeka atakta batu Deus humo ispirikpo. Atahi:

— O Sesus Deus tse babata — mykara. Atahi Deus humo tspirikporëta.

<sup>24</sup> Deus wasania ty botu tsiwabynaha. Deus humo tsikspirikponahaze iharere bo hyÿ tsimykaranaha. Iharere bo hyÿ tynakaranahaktsa! Iharere bo hyÿ tsimykaranaha zeka hawa Deus mozihikik yhyÿ tsimykaranaha. Sesus tuk tsimynapykyryknaha. <sup>25</sup> Kiristu botu mype niy:

— Kahumo meky watu tsimoziknahaktsa kytsa! Iwahatu tsimyhyrikosokdanahaze Deus tuk mywahi tsimynapykyryknaha hÿ — niy.

<sup>26</sup> Asaktsa Sesus humo batu sspirikpo mybarapetu ahabo sisopyk. Iwatahi ahabo piwatahaka sihumo pykyhytuty iwatahi piwatahaka. <sup>27</sup> Deus hyrikoso ahatuk mynapykyryk. Batu ikiyahatsa zubabyitsa Kiristu Deus hyrikoso ahabo zipaha. Deus hyrikoso atahi pahahyrinymyry babata. Wasani haty pahahyrinymyry. Ahape my:

— Sesus harere bo hyÿ tynakaranahaktsa! — my. Atahi batu mybarapetu isopyk. Iharere bo hyÿ tsimaha zeka Sesus tuk tsimynapykyryknaha hÿ.



### *Katsakta Deus hyrytsa.*

28 — O katukytsa Kiristu harere bo hyÿ tahaktsa. Iwa zeka hawa ahasopyk zeka batu ahasikpyby. Sesus myziksizoze batu ahasikpyby iwaze ahapunihikrêtsa tsimoziknaha hÿ. 29 Deus wasani mykara ana humo hi ahahyrinymyrêtsa. Asaktsa wasani mykaranaha. Deus harere bo hyÿ mykaranaha Deus hyrytsa moziknaha. Ana soho bo hi mytsaty tsimykaranaha.

## 3

1 Deus myzo myhumo tsimypokzitsiarêta. Iwatahi mype my:

— Asahi kahyrytsa — my. Katsakta Sesus tukytsa tsimaha. Ana humo hi mytsatytahaktsa! Iwaze kytsa Deus humo batu siakparawy katsa Deus hyrytsa ana humo hi batu sihyrinomyry. Sesus Deus tse babata ana humo sihyrinomyrybyitsa iwatsahi katsa Deus hyrytsa niwatihi batu sihyrinomyry.

2 O katukytsa katsakta botu Deus hyrytsa tsimaha. Aibani Deus tuk mywahi tsimynapykyryknaha. Iwaze hawa tsimaha. Batu mynyhy. Kiristu myziksizoze katsakta ihyrytywa tsimoziknaha ana humo hi myhyrinymyrêtsa. Hawa Kiristu mykara myhyrinymyrêtsa ibo tsimykozonzahaze myhyrinymyrêtsa babatsa.

3 Katsakta Kiristu wata tsimoziknaha ana humo hi mytsatytahaktsa. Iwatsahi tahasapywykynaha iwaze Kiristu wata tsimaha. Kiristu imysapyrênikita, batu amy tohi. Katsa mysopyksapybyitsa tu tsimykaranaha zeka ihumo batu mykparawy.

<sup>4</sup> Asahi pisapybyikinaha zeka Deus harere bo batu hỹ zikaha. Asaktsa simysopyksapybyitsa mykaranaha zeka Deus harere humo batu hyỹ zikaha. <sup>5</sup> Sesus zuba tsimysapyrêta. Zumuze mybarawy ezektsa bo mysapybyitsa tsimykaranaha iwatatu nimyokzohik. Ihumo zuba mysapybyitsa tsimykaranaha ana hi tsimoewyhiknaha. Sesus zuba Deus harere bo hyỹ mynakara. <sup>6</sup> Aty Kiristu harere bo hyỹ mykara imysapybara ty pimoewyhik. Pisapywyky iwa Deus mozihikik anahumo hyỹ mykara. Imysopyksapybyiri mykara zeka Sesus humo batu ispirikpo. Sesus humo batu ihyrinymyry.

<sup>7</sup> Katukytsa pykyhytutaha! Asaktsa Sesus humo batu sispirikpo ikiahatsa pahamyiwy tsihikiknaha iwatsahi pahapihikbatakanaha. Siharere bo ka waby waby byitaha! Asaktsa wasani sisopyk Deus okzeka wasani mykaranaha. Asahi Deus okzeka Kiristu watsa wasani mykaranaha. <sup>8</sup> Kytsa simysapybyitsa ziknakaranaha asaktsa hyrikoso sapybara pehakatsa Satanas hyrytsa. Tapara Deus bijoikpe mybarawy nizuknize Satanas Deus harere bo batu hỹ niy. Deus tse babata mybarawy ezektsa bo inasikze Satanas zikwy zipykbaik iwaha bo hi Sesus inasik.

<sup>9</sup> Katsa Deus hyrytsa tuze mysopyksapybyiri humo batu mymyzihik. Deus myzo hyrikoso mytuk mynapykyrykyk iwatsahi mysapybyitsa tsimykaranaha batu zikaha. <sup>10</sup> Aty Deus tse zeka sihumo myhyrinymyrêtsa. Aty Satanas tse zeka sihumo myhyrinymyrêtsa. Asahi wasanibyitsa sisopyk Deus hyrytsa byitsa tu maha. Asahi itukytsa tuk tahakyrikinaha batu Deus

hyrytsabyitsa tu maha ihumo sispirikpobyitsa. Deus hyrytsa ihumo sispirikporëtsa zeka iwatsahi taharapepokzitsikinaha.

*Tyharape pokzitsikinahaktsa kytsa.*

<sup>11</sup> Tyharape pokzitsikinahaktsa! Sesus humo tsikspirikpokonahaze ana harere tsiwabynaha. Tynaharape pokzitsikinahaktsa kytsa.

<sup>12</sup> Kaĩ waka ta byita ja. Atahi hyrikoso sapybara pehaktsa Satanas tse niy. Imysopyksapybyita nikara. Atahi tatsy zibezehik. Tatsy humo takyriki iwatahi tatsy zibeze. Itsykta wasania ty ziknakara atakta batu, imysopyksapybyri ty ziknakara. Itsy wasani ziknakara iwatahi ihumo tsizokdirëta nikara. Iwa byita ja.

<sup>13</sup> O katukytsa, Sesus humo sispirikpobyitsa ahahumo takyrikinaha zeka ahapyby byihuja.

<sup>14</sup> Asa watsa byijataha asahi sinini ykarawy bo Deus mysipeha. Katsaktsa meky watu tsimoziknaha. Mytukytsa humo mymypokzitsirëtsa. Iwatsahi batu sinini ykarawy bo tsimaha. Asaktsa ustsya mysisapybyrikinaha zeka sinini ykarawy bo maha. Asawatsa byijataha!

<sup>15</sup> Usta bo tsipisapybyrikinaha zeka mybakatsa watsa. Deus okzeka atahi tatukytsa humo takyriki mybakatsa watsa. Atahi imysopyksapybyita tu nikara batu tymoewy. Atakta Deus tuk ba mynapykyryk ana humo hi ahahyrinymyrëtsa.

<sup>16</sup> Kiristu nimyhyrinymyryky tyharape pokzitsikinahaktsa. Atahi mysapyzekenihyrikosokda. Mysapyzekeniyzik. Katsa kino niwatihiktsa tsimaha! Aty usta Sesus tukta pibeze tsihikik zeka katsa ipe tsimaha:

— O isapyzeken tsimoziknaha ipokzi tsimyhrikosodanaha — tsimaha. Iwa Kiristu nimypehaka.

<sup>17</sup> Aparakbaha Sesus tuktsa sinamybyitsa zeka mynamy ty sibo nyny tsimaha! Sibo tybiak byizeka soso byitaha:

— O katsaktsa Deus humo mypokzitsirëtsa — ba zikaha iwa zeka mybarapetu tsimykaranaha.

<sup>18</sup> Katukytsa ustsá Sesus tuktsa tsysitsumuëhînahá. Sihumo amypokzitsi zeka ahanamy ty sibo nyny tsimaha. Ahanamy tsibiaknaha. Tysisapywykynaha. Iwaze sihumo ahamypokzitsiukrëtsa tsimaha hÿ.

*Deus okzeka mypunihikrëtsa tsimoziknaha.*

<sup>19</sup> Myzubaha bo tsimysisapywykynaha zeka iwa Deus mozihihik hyÿ tsimykaranaha. Ana soho humo hi myhyrinymyrëtsa. Iwaze Deus bo batu tyso:

— Utakta amy ty akparawy yhÿ ja. Aharere baba ty yhÿ ja — iwa batu tyso. Myzubaha humo ahamypokzitsi zeka iwatsahi Deus okzeka batu ahapyby. <sup>20</sup> Tsipimyikinaha zeka mytsatyziu ty-nakaranaha:

— O abaka kamysapybyita tu mykara hawa my — tsimaha. Ahapyby byihuja Deus tsihyrinymyrëta babata mymysapywyky iwaze batu ahapyby. <sup>21</sup> Katukytsa imysapybara ty tsimykaranaha ana soho humo hi mytsaty mytsaty byijataha iwaze Deus okzeka batu mypyby. Mypunihikrëtsa tsimoziknaha. Deus bo tsimypamykysonahaze mykurëtsa tsimozikzonaha. Iwaze imysapybara humo ka mytsaty mytsaty byijataha.

22 Amy ty ibo tsimyzapykykynaha ana humo hi mybo nyny mykara. Iharere bo ma tsimykaranaha. Iwaze hawa Deus mozikik naha humo mysopyk iwatsahi amy ty tsimyzapykykynaha mybo nyny mykara. Iwatahi namywabyky. 23 Deus mype:

— Ikiahatsa Sesus humo ahaspirikpohuktsa! Tynaharape pokzitsikiknahaktsa! — niy. Iwa Deus mybo nitsasoko. Atsatu Sesus botu zahahyrinymyryky. 24 Asaktsa Deus harere bo hyÿ mykaranaha ihumo mozikikknaha sisopyk. Asa kino ihyrytsa maha. Sibō tysisapywyky sihumo tsimypokzitsiukrēta. Deus hyrikoso ihyrytsa tuk tawahi mynapykyryk. Iwaze Deus mymysapywyky, ihyrikoso mytuk tawahi mynapykyryk.

## 4

### *Deus hyrikoso wasanita mekywatuta isopykta.*

1 O kaharereziuwysitsa nanabyitaba kytsa mybo mybarapetu mynakanaha. Iwatsahi siharere humo batu hÿ. Ahamytsatyhaÿrētsa. Atahi:

— Utakta Deus hyrikoso humo pinymyryky — my. Ahamytsatyhaÿrētsa. Tapara wabyziutaha! Ikiahatsa zuba tsimypamykysokonaha:

— O ihyrinymyrywy wasani ja Iwaha ja. Deus nitsasoko — tsimaha.

2 Deus harere baba humo nitsasokoze tsinymyrykynaha. Asahi Deus harere mymyhyrinymyrynahaze mype mykaranaha:

— Deus Sesus zipehata my. Mybarawy inasikze maku niyzik — mykaranaha. Zikino Deus sohokotsa piwatawykynaha. Deus hyrikoso situk

mynapykyryk. <sup>3</sup> Utsa Sesus Kiristu soho mekytu motsasokoronaha asahi batu Deus harere ty tyso. Asaktsa:

— Deus Sesus ty mybarawy bo batu ty peha. Batu maku yzik — mykaranaha. Asatu tahyrinymyrykynaha. Deus hyrikoso situk ba zikapykyk. Asa kino Sesus bo batu siakparawy, Sesus sukyrytsitsa ana humo kino mymyhyrinymyrykynaha. Botu tsiwabynaha, atakta Sesus bo batu iakparawy isukyryhyta hyrikoso mozumu. Atahi botu izumu.

<sup>4</sup> Katukytsa ikiahatsa hi Deus hyrytsa tsimaha. Atakta Sesus humo batu iakparawy, sisukyrytsitsa moziknaha atakta hyrikoso sapybara pehakatsa ata humo hi kytsa Sesus humo batu sispirikpo. Asahi Sesus sukyrytsitsa Satanas harere bo hyỹ mykaranaha. Deus hyrikoso ahatuk mynapykyrykta abazuba tsipunihikrēta hỹ ba hawa tohi zikzukninaha. Iwatsahi Deus sohobyitsa harere nepyknaha. Sizikwy mohokda.

<sup>5</sup> Asahi Deus sohobyitsa kytsa Sesus humo batu sispirikpo asahi sinamy soho zuba mopamykysokonaha. Deus hyrikoso situk ba mynapykyryk iwaze kytsa Deus bo batu siakparawy siharere piwaby tsihikiknaha.

<sup>6</sup> Katsa hiba Deus hyrytsa tsimaha. Kytsa Sesus humo sispirikporētsa myharere piwabyziukunaha. Kytsa Deus harere bo batu hỹ mykaranaha myharere humo kino niwatihi batu siakparawy. Iwatsahi aty Deus harere baba ty mymyhyrinymyrykynaha mytsatyziu tynakaranahaktsa. Asahi mymyitsa,

wasanibyitsa mykaranaha asa humo kino batu hỹ tsimaha.

*Deus myhumo tsimypokzitsiarẽta iwatsahi tyharape pokzitsikinahaktsa!*

7 — O kaharereziuwysitsa tyharape pokzitsikinahaktsa! Sesus tuktsa bo tysisapywykynaha zeka hawa Deus mozihikik ana bo hi yhỹ tsimykaranaha. Katsa tsimyyharape pokzitsikinaha zeka Deus hyrytsa babatsa tsimoziknaha. Sesus tukytsa tsimaha. Iwaze Deus harere bo hyỹ tsimykaranaha.

8 Deus myzubaha humo tsimypokzitsiukrẽta. Ata zuba sizubarẽtsa humo mysipokzitsi tsihikik. Iwatahi aty ustsã humo ka imypokzitsiu byizeka Deus tukytsa byitsã tu. 9 Deus myhumo tsimypokzitsiukrẽta ana humo hi botu myhyrinymyrẽtsã. Deus tatse zipeha atahi itse babata. Mybarawy ezektsã bo tatse zipehaze myhumo tsimypokzitsiukrẽta ziwatawy. Sesus mysapyzeky nihyrikosokda iwaze tazo bo mymyoktyhyryk. Iwa Deus myhumo tsimypokzitsiukrẽta myhyrinymyrẽtsã hỹ.

10 Tubabatu katsã Deus humo batu mykparawy Deus zuba myhumo tsimypokzitsiukrẽta. Iwaze mybo tatse zipeha. Katsã mysopyksapybyitsã tsikykaranaha ihumo mymyokzohik. Atahi mysapyzeky nihyrikosokdaze mysapybyi tsikykaranaha Deus Sesus humo mymyokzohik. Iwaze tsimyyhyrikosokdanaha zeka Deus tuk mywahi tsimynapykyryknaha.

11 O katukytsã Deus myhumo tsimypokzitsiukrẽta zeka iwatsahi tyharape

pokzitsikinahaktsa tsimaha. <sup>12</sup> Batu aty tohi Deus ty ityny. Tsinaharapepokzitsikinaha zeka Deus mytuk mynapykyryk. Iharere bo hyỹ tsimykarannahaze ustsã bo tsimysisapywykynaha. Iwatsahi Deus zikwy mytuku myhyrinymyrẽtsã hỹ.

<sup>13</sup> Deus hyrikoso mybo zipehahik. Ihyrikoso hi mytuk mynapykyryk. Iwatsahi hawa Deus mozihihik ihyrikoso humo yhỹ tsimykarannaha. Ihyrikoso mytukze iharere bo hyỹ tsimykarannaha. Ihyrikoso kino myhumo tsimpokzitsiukrẽta. <sup>14</sup> Deus tatse babata zipeha. Mybarawy ezektsã bo zipeha iwatahi inasikze myzubarẽtsã Deus bo mymyokty tsihikik. Hawa Sesus nikara ana bo hi iktsã tsikaha. Iwatsahi Sesus Deus bo mymyoktyhyrykta ana hi myzubaha bo tsimytsasokonaha. <sup>15</sup> Aty my zeka:

“O Sesus Deus tse babata tihi my” — niy. Isikpybybyita tu Sesus Deus tse motsasoko iwaze Deus ituk mynapykyryk. Atahi hawa Deus mozihihik yhỹ mynakara. <sup>16</sup> Deus tatse zipeha atahi katsã tazo bo mymyoktyhyryk. Iwatsahi myhumo tsimpokzitsiukrẽta myhyrinymyrẽtsã. Iwatsahi katsã tihi:

— O Deus myhumo tsampokzitsiukrẽta — tsimaha. Iwaze sizubarẽtsã bo tsimytsasokonaha:

— O Deus myzubaha humo tsimpokzitsiukrẽta — tsimaha. Kytsã humo tsipisapywykynaha zeka hawa Deus mozihihik ana ty hi yhỹ tsimaha. Deus kino myhumo tsimpokzitsiukrẽta. <sup>17</sup> Sizubarẽtsã bo tsimysisapywykynaha zeka mypunihikrẽtsã



tsimoziknaha. Deus simysapybyitsa tu nikarana-hatsa boze tihi:

— Kaokzeka ikiahatsa ahamysapybyitsa tsikykaranaha. Katse ahasapyzeky nihyrikosokda iwatahi ihumo pahaokzohik — my. Iwatsahi motsasokoze katsakta batu mysikpyby. Katsakta iokzeka mypunihikrëtsa tsimaha. Kytsa bo tsimysisapywykynahaze mypunihikrëtsa tsimoziknaha. Katsa Kiristu watsa mysopyk zeka iwatsahi ihumo batu mysikpyby.

<sup>18</sup> Deus myhumo tsimypokzitsiukrëta ana humo hi tsimyspirikponaha zeka batu mypyby. Mypybybyitsa tu zeka kytsa tsimysisapywykynaha iwatsahi mypunihikrëtsa tsimaha. Mypybyrëtsa zeka katsakta:

— Deus myhumo tsimypokzitsiukrëta ja. Mysapybyitsa tu tsimykaranaha mymyokzo ja — tsimaha. Iwa tamyiba zeka mypybyrëtsa tsimoziknaha. Mypybyrëtsa tu zeka ustsaha ba zik-sipokzitsi.

<sup>19</sup> Taparaka Deus myhumo tsimypokzitsiukrëta. Abaka katsakta Deus humo mymypokzitsirëtsa. Ihumo ustsaha bo tahapokzitsikinaha hÿ.

<sup>20</sup> Katsakta ustsaha Sesus tuktsaha humo tahakyrikinaha zeka Deus harere bo batu hÿ tsimykaranaha. Kytsa humo ahamypokzitsi byizeka ba ziktsasonaha:

— O Deus ahumo mymypokzitsirëtsa — mybarapetu tsimykaranaha. Batu aty tohi Deus ty tyny. Kytsa bo iktsaha ziknakaranaha. Mytuktsaha bo iktsaha tsimykaranaha, sihumo tsimypokzitsiby-inaha zeka Deus humo kino niwatihaha ba zikmy-pokzitsi. Deus humo mymypokzitsibyitsaha babatsa

ata kino batu iktsa ziky. Iwatsahi batu ihumo mymypoکزtsi mytsaty ahabyitsa tsimykaranaha.

<sup>21</sup> Kiristu botu nimyhyrinomyryky:

— Ikiahatsa Deus humo ahapokzitsirẽtsa zeka tyharape pokzitsikinahaktsa! — niy. Iwa Kiristu nimyhyrinomyryky.

## 5

*Sesus tuktsa sispirikpobyitsa harere humo nepyknaha.*

<sup>1</sup> Kyze asaktsa Deus Sesus zipehata humo mospirikpokonaha asahi Deus hyrytsa maha. Sesus Deus tse ana hi motsasokonahaze Sesus tukytsa moziknaha. <sup>2</sup> Myzo tapokzitsi zeka ihyrytsa kino niwatihi tahapokzitsikinaha. Deus humo tsimypokzitsikinaha zeka iharere bo zuba hyỹ tsimykaranaha. Iwa tyharape pokzitsikinaha hỹ tsimykaranaha. <sup>3</sup> Deus humo tsimypokzitsikinahaze iharere bo hyỹ tsimykaranaha. Iwa ihumo tsimypokzitsirẽtsa hỹ. Batu iharere ihokdaha iwatsahi iharere bo hyỹ tsimykaranaha.

<sup>4</sup> Asaktsa Sesus humo batu sispirikpo Deus hyrytsa humo sizikwy nepykba. Katsaktsa Sesus humo mospirikporẽtsa botu sizikwy myhumo nepyk. Sesus zikwy mytuk mynapykyryk iwatsahi batu sipunihik. <sup>5</sup> Kytsa Sesus Deus tse humo sispirikporẽtsa asa zuba sispirikpobyitsa zikwy nepykbaik iwa hỹ.

*Asahi Sesus Kiristu Deus tse babata piwatawyna.*

<sup>6</sup> Deus Sesus zipeha. Mybarawy ezektsa bo inasikze Deus harere bo hyỹ ziknakara. Iwaze

Suãõ Sesus pihik ty ziharasusuze. Aiba eze zuba iharapatawyhyta humo tabezewy mysapyzekenihyrikosokda iwahatu katsa Deus tuk mywahi tsimynapykyryknaha. Nihyrikosokdaze Deus zipehata nikara. Abaka Deus zipehata mynakara. Tawahi Deus zipehata mynakara. <sup>7-8</sup> Sesus ninyhyrinymyryky:

— Utakta Deus tse — nikara. Mytsaty tsimykarannahaze hawa niy ta ziharasusuhik. Mytsaty tsimykarannahaze hawa mysapyzekenihyrikosokda atahi Deus tse babata humo myhyrinymyrẽtsa. Deus hyrikoso kino niwatihi mymyhyrinymyryky:

— Sesus Deus tse — my. Atahi wasania ty zuba mynatsasoko. Iwatsahi harakykbyi myspirikpowy Sesus Deus tse babata mykaranaha iwatsahi myhyrinymyrẽtsa. <sup>9</sup> Maku harere humo tsikspirikponaha. Deus imysapyrẽnikita iwaze iharere humo tsikspirikpobanaha hỹ. Abaka aty mybo nitsasoko Sesus Deus tse ata kino Deus tihi my. Iwatahi iharere wasani hỹ. <sup>10</sup> Deus hi tatse soho nitsasoko. Asahi Sesus humo sispirikporẽtsa:

— O Deus tse Sesus humo kaspirikporẽta wasani myhỹ — maha. Sispirikpobyitsa:

— Amy ty Deus tatse soho nitsasoko batu kaspirikpo, iharere bo batu hỹ — maha. Iwa motsasokonahaze Deus imyspihikbatanikita wata mykaranaha. Simysapybyitsa tu iharere humo batu sispirikpo iwatsahi Deus imyspihikbatanikita motsasokonaha. <sup>11</sup> Deus harere bo wabyziutaha! Deus:

— Katse ahasapyzekenihyrikosokda anahumo hi mekywa tu tsimyzurukunaha! Sesus tuk

tsimyzurukunahaktsa! Tsimyhyrikosokdanahaze katuk ahawahi tsimynapykyryknaha — niy.

<sup>12</sup> Asahi Deus tse humo sispirikporëtsa meky watu moziknaha. Sesus tuk mozurukunaha. Myhyrikosokdanahaze Deus tuk tahawahi mynapykyryknaha. Sispirikpobyitsa batu. Sesus zikwy situk ba zikapykyryk mohyrikosokdanahaze batu Deus tuk zikapykyryknaha. Nokponi mynapykyryknaha sinini ykarawy bo tahasapy-naha.

*Asaktsa mohyrikosokdanahaze tahawahi Deus tuk mynapykyryknaha.*

<sup>13</sup> Ahabo ziwatahaka. Ikiahatsa Deus tse humo ahaspirikporëtsa iwaze meky watu tsimoziknaha. Sesus tuk tsimyzurukunaha. Tsimyhyrikosokdanahaze ahawahi Deus tuk tsimynapykyryknaha hỹ. Iwatahi ahabo piwatahaka. <sup>14</sup> Kyze katsaktsa Deus bo tsimypamykysokonaha. Deus bo tsimyzapykykynaha zeka hawa Deus mozi-hikik iwaze myharere piwaby. Iwatsahi mypuni-hikrëtsa tsimoziknaha nawa ibo tsimyzapykyknaha. <sup>15</sup> Myhyrinymyrëtsa tu myharere piwaby zeka amy ty tasapyky zeka Deus mybo nyny my. Amy ty mozi-hikik naha zuba ibo tasapyky zeka iwaze mybo nyny myhỹ.

<sup>16-17</sup> Aty mytukytsa tuk isopyksapybyi mykara zeka ikiahatsa itsyhyryze Deus bo tsimypamykysokonaha. Deus sisopyksapybyi mysiokzohik iwaze Deus tuk tawahi mynapykyryk. Myzubarëtsa tamiyikik. Atakta Deus okzeka batu imysapy ihyrikoso pimijjanaha zeka atahi ba iokzohok iwaze itsyhyryze Deus bo ba zikpamykyso. Atakta sinini ykarawy bo Deus

pipeha. Nokponi Deus bara botu sinini ykarawy bo tasapy.

<sup>18</sup> Deus hyrytsa imysapybara humo ba hÿzo zikaha. Deus tse sihumo tsimypokzitsiukrêta tu iwatsahi sisopyksapybyitsa tu batu hÿ mykaranaha. Satanas sihumo batu ziky Deus tse sihumo tsimypokzitsiukrêta hÿ.

<sup>19</sup> Katsakta Deus hyrytsa tsimaha. Deus zikwy mytuk mynapykyryk iwatsahi myhyrinymyrêtsa. Utsa mybarawy ezektsa pykyhytu zikahabyik-itsa Satanas zikwy situk mynapykyryk iwatsahi sispirikpobyitsa mynakanaha.

<sup>20</sup> Deus tse inasik. Botu mybarawy bo izumu ana humo hi myhyrinymyrêtsa. Deus soho humo nimyhyrinymyryky. Hawa Deus mykaraze nimyhyrinymyry iwaze Deus babata humo nimyhyrinymyryky. Ata zuba wasani mykara. Ata zuba isopyksapyrênikita. Ata soho humo hi tsipinymyrykynaha. Sesus humo myspirikporêtsa. Sesus Deus tse humo tsimyspirikpokonaha zeka Deus humo myhyrinymyrêtsa. Iharere bo zuba hyÿ tsimykanaha iwaze meky watu tsimoziknaha. Ata zuba Deus babata. Aty iharere bo hyÿ mykara mekywa tu mozik. Mohyrikosokdaze Deus tuk tawahi mynapykyryk hÿ.

<sup>21</sup> Kahyrytsa pykyhytutaha! Deusbyitsa harere bo ka yhÿ byitaha kytsa Deus soho pimynaha zeka iwatsahi pykyhytutaha!

Suão

# **Deus Harere Aibaky Sesus mymyspirikpoko naha**

## **New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

2f0260ea-5969-5180-9ac5-183d63a989f1